

**Акафист**  
**Пресвятой Богородице перед Ея иконой,**  
**именуемой «Державная»**

**Кондак 1**

Избранней от всех родов Заступнице рода христианскаго, покровом Своея благости покрывающей страну нашу православную, благодарственная пения приносим Ти, Владычице, о явлении нам чудныя иконы Твоея «Державныя». Ты же, яко Всемилостивая Заступница всех с верою к Тебе притекающих, от всяких нас бед свободи, да зовем Ти:

Радуйся, Мати божия Державная, Заступнице усердная рода христианскаго.

**Икос 1**

Ангелом радость приимшая, благоволила еси, Владычице, возвестити старице благочестивей радость о явлении иконы Твоея честныя «Державныя», юже и обретше по указанию Твоему, яко знамение милости Божией к нам, грешным, благодарственно вопием Ти сице:

Радуйся, воли Господней тайны нам открывающая;

Радуйся, гнев Его праведный, на ны  
движимый, умягчающая.

Радуйся, зловерия нечестивых обличение;

Радуйся, гордыни их низложение.

Радуйся, веры христианския утверждение;

Радуйся, почитания святых икон освящение.

Радуйся, тихое пристанище спасения душ  
наших;

Радуйся, Всемиловитая Заступнице наша у  
престола Святыя Троицы.

Радуйся, от бед и скорбей наше избавление;

Радуйся, Церкви Православныя  
утверждение.

Радуйся, звездо не вечерняго света, нас  
озаряющая;

Радуйся, Матерь Света, всех просвещающая.

Радуйся, Мати Божия Державная,  
Заступнице усердная рода христианского.

## **Кондак 2**

Видящи, Всенепорочная, с высоты  
небеснаго жилища Своего, идеже с Сыном  
Твоим во славе пребываеши, скорбь верных  
рабов Твоих, яко гневнаго ради Божия  
посещения вера Христова поругаема бывает  
нечестивым зловерием, благоволила еси явити  
нам икону Твою «Державную», да вси

христоролюбивии людие усердно молятся пред нею, вопиюще Богу: Аллилуиа.

## Икос 2

Разуму нашему просвещение свыше  
исходатайствуй, Пресвятая Богородице, да  
познаем, что есть воля Божия благая, угодная и  
совершенная, и сердце направи, еже со  
усердием творити ю, Тебе же, Всемиловитая  
Заступнице, непрестанными гласы восхваляти:

Радуйся, явлением честных икон Твоя  
тьму лютых обстояний от нас отгоняющая;

Радуйся, лучами чудес всех просвещающая.

Радуйся, душевными и телесными очами  
ослепших прозрение;

Радуйся, омраченных смыслов просвещение.

Радуйся, всех христиан вождельная  
Помощнице;

Радуйся, всех уповающих на Тя  
непостыдная надеждо.

Радуйся, вдов и сирот надежный покрове;

Радуйся, алчущих Питательнице.

Радуйся, духовных сокровищ Подательнице;

Радуйся, богомудрых премудрая доброто.

Радуйся, пресветлая, Божественная красото;

Радуйся, обоняние Христова благоухания.

Радуйся, Мати Божия Державная,  
Заступнице усердная рода христианскаго.

### Кондак 3

Силу Божественныя благодати даруй нам,  
Пресвятая Богородице, во еже неуклонно и  
непреткновенно ходити нам спасительным  
путем Христовых заповедей, сердцем же и  
устами непрестанно воспевати Всемогущему  
Богу: Аллилуиа.

### Икос 3

Имуще Тя, Богоизбранная Заступнице рода  
христианскаго, яко зарю светлую,  
просвещающую душ наших темноту и  
разгоняющую мрак сердечнаго неведения  
нашего, припадаем к честней иконе Твоей  
«Державней» и с умилением вопием Ти сице:

Радуйся, сохраняти и спасти всех  
призывающих Тя обещавшая;

Радуйся, прославляющих Тя  
прославляющая.

Радуйся, к Сыну Твоему и Богу нашему  
молитвы верных приносящая;

Радуйся, благодать Твою иконам Твоим  
честным даровавшая.

Радуйся, всю вселенную лучами Твоея  
благодати озарившая;

Радуйся, премудрости Божия приятище.

Радуйся, Божественная благодати  
Подательнице;

Радуйся, яко Тобою от вечныя смерти  
свобождаемся.

Радуйся, яко Тобою безконечныя жизни  
сподобляемся;

Радуйся, честнейшая Херувим и славнейшая  
Серафим.

Радуйся, Матерь Света и Царице Небесная;  
Радуйся, Владычице, Всемиловитая за нас  
пред Богом Заступнице.

Радуйся, Мати Божия Державная,  
Заступнице усердная рода христианскаго.

#### **Кондак 4**

Буря житейскаго моря сокрушает духовный  
корабль наш волнами мирских попечений, и  
мир убогих душ наших мятется. И где обрящем  
тихое пристанище спасения? Токмо на Тя  
возлагаем надежду, Владычице; имущи бо  
державу непобедимую, от всяких бед, глада,  
скорбей и болезней избави нас, верно  
вопиющих Богу: Аллилуиа.

#### **Икос 4**

Слышавше православнии людие повеление  
Твое, Владычице, молитися пред образом

Твоим «Державным», со умилением сердечным  
прибегают к Твоему всесильному заступлению  
у престола Всемогущаго Бога и благоговейно  
вопиют Ти сице:

Радуйся, горняго мира украшение;

Радуйся, дольняго мира заступление.

Радуйся, Дщи благословенная Отца  
Небеснаго;

Радуйся, Родительнице неискусомужная  
Сына Предвечнаго.

Радуйся, демонския полки побеждающая;

Радуйся, враги спасения человеческого  
посрамляющая.

Радуйся, яко волею Твоею сокрушаются  
еретические главы;

Радуйся, яко вернии Тобою сподобляются  
славы.

Радуйся, телес наших безмездная  
Целительнице;

Радуйся, душ наших к Царствию горнему  
Путеводительнице.

Радуйся, яко сотвори Тебе величие  
Сильный;

Радуйся, яко призре на смирение Твое  
Господь.

Радуйся, Мати Божия Державная,  
Заступнице усердная рода христианскаго.

## Кондак 5

Боготечная звезда явился нам, Владычице, честная Твоя икона «Державная», страну Российскую всю обтекающая и лучами чудес Твоих осиявающая всех блуждающих по морю страстного жития, мрак печалей и мглу всяческих недугов и скорбей прогоняющая и наставляющая на путь спасения с верою к Тебе притекающих и вопиющих Богу: Аллилуиа.

## Икос 5

В дни лютых скорбей и злых обстояний явила еси нам, Владычице, велию милость обретением честных икон Твоих «Державных», да вси с верою молящиеся пред нею примут здравие и душ спасение. Сего ради и мы, прославляюще Твое милосердие неизреченное, усердно вопием Ти сице:

Радуйся, светило незаходимое, светом истинного богопознания нас просвещающее;

Радуйся, Вратарнице, двери райския верным отверзающая.

Радуйся, многотекущая река Божественных благодати;

Радуйся, неистощимый источник святыни.

Радуйся, ко благочестию наша Наставнице;

Радуйся, душ наших освящение.

Радуйся, кающихся грешников с Богом  
примирение;  
Радуйся, добрыя обеты приемлющая.  
Радуйся, благим намерениям  
способствующая;  
Радуйся, злыя начинания разрушающая.  
Радуйся, вражия козни расторгающая;  
Радуйся, скорая человеком Помощнице.  
Радуйся, Мати Божия Державная,  
Заступнице усердная рода христианскаго.

### **Кондак 6**

Воспеваем Твое милосердие досточудное и  
многое к нам снисхождение, Пресвятая  
Богородице, не престаеши бо молитися о нас,  
грешных, Сыну Твоему и Богу нашему, еже  
отвратити гнев Его праведный, на ны  
движимый, и помиловати всех верно вопиющих  
Богу: Аллилуиа.

### **Икос 6**

Воссиявает в души наша, омраченныя  
скорбию и унынием от множества согрешений,  
свет благодатнаго утешения, и сердце наше  
исполняется веселия и радости, егда  
непрестанными Твоими, Владычице,  
вразумлениями возбуждаеши нас вопити к

щедрому Богу, да милостив будет и простит нам прегрешения наша. Не премолчи убо, Владычице, наставляющи и вразумляющи нас, зовущих Ти сице:

Радуйся, в скорбех и болезнях долготерпению нас научающая;

Радуйся, вся помышления наша к распятому за грехи мира Спасителю устремляющая.

Радуйся, страдания Его и крестную смерть в памяти нашей обновляющая;

Радуйся, правосудием Божиим к ожесточенным и нераскаянным нас устрашающая.

Радуйся, ожиданием будущих небесных благ нас улаждающая;

Радуйся, к наследству нетленному и вечному нас приводящая.

Радуйся, наследниками Царствия Божия нас сотворяющая;

Радуйся, трапезо святая, хлебом жизни нас питающая.

Радуйся, маслине благоплодная, елеем милости сердца умягчающая;

Радуйся, яко молитвою пред иконою Твоею приемлем духовное утешение.

Радуйся, яко сердцам нашим даруеши благодатное сокрушение;

Радуйся, яко благостынею Твоею угашаеши в нас огонь нечестия.

Радуйся, Мати Божия Державная,  
Заступнице усердная рода христианского.

### **Кондак 7**

Хотяй всем человеком спастися и в разум  
познания истины приити, премилосердный  
Господь и Создатель наш посла во дни  
гневнаго посещения Своего ангела пресветла в  
новоявленнем образе Твоем «Державном», да  
все с верою молящися пред ним, примут  
помощь и заступление Твое всеильное и  
радостно вопиют Всемогущему Богу:  
Аллилуиа.

### **Икос 7**

Новую показа милость всех Творец и  
Владыка наш Господь, егда положи во гневе  
Своем наказати род человеческий огнем,  
мечем, голодом и болезнями, сотвори сие  
наказание для многих человеков ко  
вразумлению и исправлению во спасение душ.  
Сего ради и мы, Владычице, припадающе к  
Пречистому образу Твоему «Державному»,  
усердно молим Тя: не даждь нам погибнути до  
конца, но милосердия двери отверзи нам,  
вопиющим Ти сице:

Радуйся, неприступнаго Божества селение;  
Радуйся, ангельское непрестающее  
удивление.

Радуйся, рабов Божиих тайное вразумление;  
Радуйся, Заступнице всех сущих в скорбех и  
болезнях.

Радуйся, благодатное безстрастие ищущим  
его подающая;

Радуйся, всех в чистоте целомудрия  
живущих зело любящая.

Радуйся, пристанище небурное  
подвижников благочестия;

Радуйся, гневом Божиим вразумляющая  
сынов нечестия.

Радуйся, безмолвствующих сладкая  
Собеседнице;

Радуйся, отшельников Христа ради крепкое  
упование.

Радуйся, постников Божественное  
радование;

Радуйся, пустынножителей тихое веселие.

Радуйся, Мати Божия Державная,  
Заступнице усердная рода христианскаго.

### **Кондак 8**

Странни и пришельцы есмы на земли сей:  
житие бо наше суетно и маловременно есть.  
Мы же смерти безвестное во ум никогдаже

приемлем, ни помышляем о Страшном судищи Христове, в немже имамы праведному Судии предстати и дати ответ о всяком же деле и слове. Темже молим Тя, Владычице: возбуди нас скоро от сна греховнаго, да не постигнет нас час смерти неисправленных и да сподобимся Твоим ходатайством получитьи беззакониям нашим прощение и во гласе радования воспевати Христу Богу: Аллилуиа.

### Икос 8

Вся бывши горе, к небесным взята еси и земных не оставляеши, Пресвятая Богородице, священным Твоим предстательством: имаши бо дерзновение к Сыну Твоему и Богу нашему. Темже утверди, Владычице, в мире глубоце страну нашу православную и вся полезная даруй рабом Твоим, да величающе воспеваем Ти тако:

Радуйся, умным очесем нашим горький и страшный час смертный представляющая;

Радуйся, на кийждо день, аки уже на последний жития нашего, взирати нас научающая.

Радуйся, любити мир и яже в мире нам воспрещающая;

Радуйся, пристрастие к тленному богатству из сердца нашего искоряющая.

Радуйся, вся блага земная быти привременна  
и скоропреходяща нам показующая;

Радуйся, славы человеки, аки тени  
преходящая, искати нам возбраняющая.

Радуйся, яко сладчайшее имя Господа  
Иисуса Христа устами непрестанно  
произносити и во уме держати нас  
побуждаеши;

Радуйся, яко от празднословия,  
многоглаголения, паче же от кощунства нас  
удержаваеши.

Радуйся, яко воздержанию в пищи и питии  
приобучити нас печешися;

Радуйся, яко Твое за нас ходатайство сильно  
есть пред Богом, еже не вверженным нам быти  
во тьму кромешнюю.

Радуйся, яко присно внушаеши нам омывати  
грехи своя слезами покаяния, да избавимся  
геенны адския;

Радуйся, яко побуждаеши нас день и ночь  
молитися, да не посланы будем со демоны  
мучитися.

Радуйся, Мати Божия Державная,  
Заступнице усердная рода христианскаго.

## **Кондак 9**

Всякое естество ангельское удивися делу  
Твоего милосердия, Господи, яко даровал еси

нам толико твердую и теплую Заступницу роду христианскому во дни гневнаго Своего посещения, нам невидимо сопребывающую, слышащую же Тебе поющих: Аллилуиа.

## Икос 9

Ветии многовещаннии, непросвещеннии светом истиннаго богопознания, поклонишася златому тельцу. По слову же апостола, всяк любостяжатель есть идолослужитель. Сего ради Божие гневное посещение всему миру зряще, и мы, грешнии, смиренно молим Тя, Владычице: умилостави Создателя, да потщится гнев Свой праведный преложити на милость и помиловати нас, вопиющих Ти сице:

Радуйся, яко Твоя помощи и заступления никогдаже нас лишаеши;

Радуйся, яко ум наш, омраченный небрежением, светлым Твоим покровом озаряеши.

Радуйся, яко Тобою от страстей телесных избавляемся;

Радуйся, яко Тобою сладостей духовных исполняемся.

Радуйся, твердое Православия укрепление;

Радуйся, честное Пресвятыя Троицы носило и похваление.

Радуйся, и во временней жизни полезная нам  
подающая;

Радуйся, душевныя раны наша елеем  
спасительным умащающая.

Радуйся, яко из рова беззаконий наших  
рукою Твоея помощи нас исхищаеши;

Радуйся, яко греховный сон душевредныя  
нашея лености отрясаеши.

Радуйся, душевное умиление и сердечное  
сокрушение в нас раждающая;

Радуйся, яко твориши всем спастися, в  
державный покров Твой прибегающим.

Радуйся, Мати Божия Державная,  
Заступнице усердная рода христианскаго.

### **Кондак 10**

Спасти хотя многия люди от обдержавших их  
скорбей и болезней и веру их утвердити во  
всесильное заступление Твое, Владычице,  
даровала еси нам изображение честныя иконы  
Твоея «Державныя», да вси, видяще являемую  
Тобою милость, вопиют со умилением Богу:  
Аллилуиа.

### **Икос 10**

Стена явилася еси, Богородице Дево,  
Российстей стране честными Твоими иконами,

изливающи чудеса во бранех и осеняющи  
благодатною помощию Твоею христоролюбивых  
воинов. Под державным бо покровом Твоея  
благости Российская страна созидашеся, и  
врата ада не одолеша Православныя Церкви  
Христовы. Сего ради припадающе к честней  
иконе Твоей «Державней», радостно вопием Ти  
сице:

Радуйся, Российския страны покрове и  
утверждение;

Радуйся, от нашествия иноплеменных  
избавление.

Радуйся, сущих в пленении свободение;

Радуйся, от глада и болезней наше спасение.

Радуйся, саде земли обетования;

Радуйся, цвете Божественнаго саждения.

Радуйся, лозо добродетельная винограда  
Христова;

Радуйся, древо чудоточное рая Иисусова.

Радуйся, жилище и дом Христа Бога нашего;

Радуйся, вместилище неизреченныя Его  
славы.

Радуйся, Владычице, Всемиловитая  
Подательнице щедрот;

Радуйся, яко много может молитва Твоя  
пред Сыном Твоим и Богом нашим.

Радуйся, Мати Божия Державная,  
Заступнице усердная рода христианскаго.

## Кондак 11

Пение хвалебное и благодарственное приносим Ти, Владычице, под державным бо покровом Твоея благодати пребываем в непостыдней надежде всесильнаго заступления Твоего за нас, грешных, и все упование наше на Тя возложивше, радостно вопием Богу: Аллилуиа.

## Икос 11

Светильницы наши угасоша, елея же благих дел не имамы, во еже возжещи благодать Духа Святаго. И где обрящемся, окаяннии, сном греховным отягченнии, егда постигнет нас внезапу в полунощи час кончины нашея? Но да не услышим и мы, якоже юродивыя девы, грознаго гласа Жениха: не вем вас! Помози нам, Владычице, наполнити сосуды душ наших елеем благих дел, паче же милосердия и смирения, да благодарственно воспоем Ти сице:

Радуйся, яко воспоминанием грядущаго грознаго суда Божия от грехов нас отреваеши;

Радуйся, яко души наши, аки невесту, ко сретению прекраснаго Жениха Христа предуготовляти нас поучаеши.

Радуйся, яко возбуждаеши нас на всяк день  
же и час приносити Христу Богу молитвы,  
прошения и благодарения;

Радуйся, яко с мудрыми девами, душами  
праведных, внити в брачный чертог Сына  
Твоего и Бога нашего помогаеши.

Радуйся, яко в ризу непорочности и чистоты  
облещися нам способствуеши;

Радуйся, яко стати нам на Страшнем суде  
Христово одесную Его ходатайствуеши.

Радуйся, яко благоутробие Божие о  
причастии нас лику избранных умоляеши;

Радуйся, яко ум наш, омраченный  
небрежением, светом Своим озаряеши.

Радуйся, яко голубину простоту и агнчу  
кротость стяжати нам приискренне желаеши;

Радуйся, яко самоотвержению и отречению  
от злыя нашея воли приобучити нас тщишися.

Радуйся, яко младенческое незлобие  
даровати нам способствуеши;

Радуйся, яко хладное сердце наше  
молитвами воспламеняти нам помогаеши.

Радуйся, Мати Божия Державная,  
Заступнице усердная рода христианскаго.

## **Кондак 12**

Благодать прияла еси, Владычице, от  
Всемогущаго Господа Бога миловати

благочестивых чад Церкви Христовы и  
вразумляти нечестивых сынов ея. Сего ради,  
притекающе под державный покров Твоея  
благости, усердно молим Тя, Владычице:  
избави нас от ухищрений духов злобы,  
разслабляющих наши душу и тело леностию и  
нерадением, и возбуди нас от сна греховнаго,  
да благодарственно вопием Богу: Аллилуиа.

## Икос 12

Поюще Твоя чудеса, бывшая в древняя и  
настоящая времена, хвалим Тя, Владычице, яко  
живоносный источник благодати и  
неистощимую чудес реку, бездну бо милости и  
щедрот даровала еси роду христианскому  
явлением честных икон Твоих. Сего ради и мы,  
припадающе к честней иконе Твоей  
«Державней», со умилением вопием Ти сице:

Радуйся, Церкви Небесныя и земныя  
украшение;

Радуйся, девства честный покрове и  
ограждение.

Радуйся, светлое пророческое сбытие;

Радуйся, всехвальных апостолов  
восхваление.

Радуйся, честная похвало иереев  
благоговейных;

Радуйся, молние, неверных устрашающая.

Радуйся, славою чудес Твоих верных  
смыслы озаряющая;

Радуйся, печаль и скорбь нашу в радость  
претворяющая.

Радуйся, яко молиши Сына Твоего и Бога  
нашего всем нам спастися;

Радуйся, яко твориши милости всем в  
державный Твой покров притекающим.

Радуйся, Заступнице всех сущих в скорбех и  
болезнях;

Радуйся, всем с верою Тебе молящимся  
полезная дарующая.

Радуйся, Мати Божия Державная,  
Заступнице усердная рода христианскаго.

### **Кондак 13**

О всепетая Мати, Державная Владычице!  
Приими ныне сие малое моление наше и  
величия ради благодати Твоея и неизреченных  
щедрот Твоих не помяни множества грехов  
наших, но исполни во благих прошения наша:  
даруй нам вся потребная к жизни и  
благочестию, избави нас от глада, болезней и  
печали, и Царствия Небеснаго наследники всех  
сотвори, верно вопиющих Богу: Аллилуиа.

*Этот кондак читается трижды,  
затем первый икос и первый кондак.*

## Молитва Пресвятой Богородице перед Ея иконой, именуемой «Державная»

О, Державная Владычице Пресвятая Богородице, на объятиях Своих держащая Содержащаго всю вселенную Царя Небеснаго! Благодарим Тя за неизреченное милосердие Твое, яко благоволила еси явити нам, грешным и недостойным, сию святую и чудотворную икону Твою во дни сия лукавыя и лютыя, яко вихрь, яко буря внутренняя нашедшая на страну нашу, во дни уничижения нашего и укорения, во дни разорения и поругания святынь наших от людей безумных, иже не точию в сердце, но и устнами дерзостно глаголют: несть Бог: и в делех сие безбожие показывают. Благодарим Тя, Заступнице, яко призрела еси с высоты святыя Своея на скорби наша и горе нас православных, и яко солнце светлое, увеселяеши изнемогшия от печали очеса наша пресладостным зрением Державного образа Твоего. О, Преблагословенная Мати Божия, Державная Помощнице, крепкая Заступнице! Благодаряще Тя со страхом и трепетом, яко раби непотребнии, припадаем Ти со умилением, с сокрушением сердечным и со слезами, и молим Тя и стеляще вопием Ти: спаси нас, спаси! Помози нам, помози! Потщися: погибаем! Се

живот наш аду приближися: се обышедше  
обыдоша нас греси мнози, беды мнози, врази  
мнози. О, Небесная Царице! Скипетром власти  
Твоея Божественныя разсей, яко прах, яко дым,  
нечистивыя козни врагов наших видимых и  
невидимых: сокруши велеречивыя  
помышления их и запрети им: и яко Мати всех,  
на путь правый и богоугодный настави их.  
Вкорени в сердца всех нас правду, мир и  
радость о Дусе Святе: водвори в стране нашей  
тишину, благоденствие, безмятежие, любовь  
друг ко другу нелицемерную. Державою Твоею  
всесильною удержи, Пречистая, потоки  
беззакония, хотящия потопити Землю Русскую  
в страшней пучине своей. Поддержи нас  
слабых, малодушных, немощных и унылых,  
укрепи, возстави и спаси: яко да под Державою  
Твоею всегда храними, поем и величаем  
Пречестное и Великолепое имя Твое, ныне и  
присно и во веки веков. Аминь.

## Молитва иная

О мира Заступнице, Мати Всепетая! Со страхом, верою и любовью припадающе пред честною иконою Твоею Державною, усердно молим Тя: не отврати лица Твоего от прибегающих к Тебе. Умоли, милосердная Мати Света, Сына Твоего и Бога нашего, Сладчайшего господа Иисуса Христа, да сохранит в мире страну нашу, да утвердит державу нашу в благоденствии и избавит нас от междоусобных брани, да укрепит святую Церковь нашу Православную, и непозыблему соблюдет ю от неверия, раскола и ересей. Не имамы бо иныя помощи, разве Тебе, Пречистая Дево: Ты еси всесильная христиан Заступница пред Богом, праведный гнев Его умягчающая. Избави всех, с верою Тебе молящихся, от падений греховных, от навета злых человек, от глада, скорбей и болезней. Даруй нам дух сокрушения, смирение сердца, чистоту помышлений, исправление греховныя жизни и оставление согрешений наших; да вси, благодарна воспевающе величия Твоя, сподобимся Небеснаго Царствия и тамо со всеми святыми прославим пречестное и великолепое имя в Троице славимаго Бога: Отца, Сына и Святаго Духа. Аминь.

## **Тропарь Пресвятой Богородице перед Ея иконой, именуемой «Державная»**

### **Тропарь, глас 8:**

Ангелов лица благоговейно Тебе служат и  
вся Небесныя силы немолчными гласы Тя  
ублажают, Богородице Дево; усердно молим  
Тя, Владычице, да пребудет Божественная  
благодать на честней иконе Твоей  
«Державней», и светозарный луч славы чудес  
Твоих да нисходит от Нея на всех с верою Тебе  
молящихся и вопиющих Богу. Аллилуиа.

### **Тропарь, глас 4:**

Заступнице верных преблагая и скорая,  
Пречистая Богородице Дево! Молим Тя пред  
святым и чудотворным образом Твоим, да  
якоже древле от него заступление Твое граду  
Москве даровала еси, тако и ныне нас от всяких  
бед и напастей милостивно избави и спаси  
души наша, яко милосердая.

## **Иной Тропарь, глас 4:**

Града Сионска взыскующе, под Твой покров, Дева Чистая, днесь притекаем, и никтоже возможет на ны, яко несть град силен, аще не Сущаго Бога, и несть ина крепость, аще не милость Владычицы Девы.

## **Иной тропарь, глас 4:**

Век скончавается, любовь оскудевает, победу лукавый торжествует, и кто нам помощи может, аще не Ты, Дево, Чудная Мати, оградиши Крестом Сына Твоего.

## **Кондак, глас 2:**

В небесныя обители преселившаяся с плотию, сущия на земли никакоже оставила еси, Богородице, образ божественный и многочудесный Пречистаго лица Твоего зрети любящим Тя и поклонятися даровала еси. Яко знамение Твоея благодати, чтим его, лобызающе.

## **Кондак, глас 8:**

Взбранной Воеводе победительная песни приносим, яко даровася нам держава Твоя, и

ничесоже утрашимся, не от мира бо спасение наше, но превознесенныя Владычицы милосердием ограждаемся и тому днесъ радуемся, яко прииде Заступнице на стражу земли Своея.

### **Иной кондак, глас 8:**

Взбранной Воеводе, Заступнице нашей Державней, песни благодарственныя приносим о даровании нам иконы Ея святыя, еуже ограждаеми, ничесоже утрашимся, не от человек бо спасение наше, но Преблагословенныя Владычицы милосердием. Темже днесъ радуемся и празднуем светло, яко прииде Державная на стражу земли Своея.

### **Иной кондак, глас 8:**

Избранней от всех родов Заступнице рода христианскаго, покровом Своея благости покрывающей страну нашу православную, благодарственныя пения приносим Ти, Владычице, о явлении нам чудныя иконы Твоея Державныя. Ты же, яко Всемиловитая Заступница всех, с верою к Тебе притекающих, от всяких нас бед свободи, да зовем Ти: радуйся, Мать Божия Державная, Заступнице Усердная рода христианскаго.

## **Величание**

Величаем Тя, Пресвятая Дево,  
Богоизбранная Отроковице, и чтим Державный  
образ святыни Твоея, имже подаеши велию  
милость всем, с верою к нему притекающим.

## **Иное Величание**

Достойно есть величати Тя, Богородице,  
честнейшую Херувим и славнейшую без  
сравнения Серафим.

## **Иное Величание**

Достойно есть величати Тя, Богородице,  
земли Русския Царицу Небесную и людей  
православных Владычицу Державную.